

USLOVI ZA OSIGURANJE OD ODGOVORNOSTI VJEŠTAKA

Osiguravač – „Grawe osiguranje“ a.d. Banja Luka

Ugovarač osiguranja – osiguranik ili neko drugo pravno ili fizičko lice koje u korist osiguranika sa osiguravačem zaključi ugovor o osiguranju od odgovornosti vještaka;

Osiguranik – vještak koji u skladu sa pozitivno pravnim propisima ispunjava uslove za obavljanje vještačenja, imenovan prema važećim propisima i čija je odgovornost osigurana;

Naručilac – pravno ili fizičko lice, sud ili druga institucija koja zahtijeva vještačenje, tj. angažuje i plaća vještaka za njegovo vještačenje;

Osigurana suma – gornja granica (najviši iznos) obaveze osiguravača po jednom osiguranom slučaju;

Agregatni limit – gornja granica obaveze osiguravača za sve osigurane slučajeve ostvarene unutar jedne osiguravajuće godine;

Polisa osiguranja – isprava o ugovoru o osiguranju;

Premija osiguranja – iznos koji ugovarač osiguranja plaća osiguravaču na osnovu ugovora o osiguranju.

Član 1.

Predmet osiguranja

Predmet osiguranja prema ovim uslovima je zakonska profesionalna odgovornost osiguranika za štete koje prouzroči strankama u postupku tokom obavljana vještačenja, prema važećim propisima, radi utvrđivanja ili razjašnjenja činjenica u postupku, ukoliko se drugačije ne ugovori.

Član 2.

Osigurani slučaj

(1) Osiguranim slučajem u smislu ovih uslova smatra se propust ili greška osiguranika, u pogledu savjesnog i urednog postupanja, tj. postupanja u namjeri dobrog stručnjaka, koji ima za posljedicu nastajanje štete, čiju bi naknadu mogla zahtijevati oštećena osoba. Smatra se da je osigurani slučaj nastao, kad je osiguranik povrijedio pravila struke po kojem se vještačenje obavlja ili koju od svojih dužnosti predviđenih pozitivnim pravnim propisima.

(2) Uslovima osiguranja nisu obuhvaćene štete od odgovornosti za propuste ili greške, koje su bile poznate u vrijeme zaključenja ugovora o osiguranju ili nisu mogle ostati nepoznate stranama u postupku.

(3) U slučaju sumnje smatra se da je propust ili greška učinjena onog dana, kad je neka od radnji trebala biti preduzeta kako bi se spriječilo nastajanje štete.

Član 3.

Teritorijalno pokriće

Osiguranjem su obuhvaćeni osigurani slučajevi nastali na teritoriji Bosne i Hercegovine, ukoliko se drugačije ne ugovori.

Član 4.

Osigurana suma i agregatni limit

Osigurana suma predstavlja gornju granicu obaveze osiguravača po jednom osiguranom slučaju, ali ujedno predstavlja i gornju granicu obaveze za sve osigurane slučajeve unutar jedne osiguravajuće godine (agregatni limit).

Član 5.

Franšiza (učesće osiguranika u šteti)

- (1) Učesće osiguranika u svakoj šteti iznosi 10% od obračunate naknade osiguravača, a najmanje 500 KM, ukoliko nije drugačije ugovoreno.
- (2) Franšiza, ukoliko je ugovorena, mora biti obavezno upisana u polisu osiguranja.

Član 6.

Isključenja iz pokrića

Osiguranjem nisu obuhvaćeni odštetni zahtjevi:

- (1) Za štete koje su direktna ili indirektna posljedica oštećenja zdravlja i tijela, te oštećenja i uništenja stvari;
- (2) Za štete koje su posljedica profesionalnih grešaka, nastalih u trenutku kada osiguranik nije imao valjano rješenje o imenovanju za vještaka od nadležne institucije koja izdaje takva rješenja;
- (3) Iz vještačenja nakon pravosnažne odluke nadležne institucije kojom je proglašen nesposobnim za obavljanje djelatnosti ili struke za koju je imenovan, ili pravosnažne sudske odluke kojom mu je oduzeta poslovna sposobnost;
- (4) Iz vještačenja ako se utvrdi da nisu postojali odnosno da su prestali uslovi na osnovu kojih je osiguranik imenovan;
- (5) Zbog gubitka podataka ili dokumenata (pisanih, štampanih ili elektronski pohranjenih), koji su bili povjereni osiguraniku na čuvanje;
- (6) Za štete koje su nastale u vezi sa plaćanjem ili obračunom nagrade vještaku ili troškova (putni troškovi, troškovi za dnevnice);
- (7) Zbog ugovornog proširenja odgovornosti osiguranika i na slučajeve kad po zakonu ne odgovara;
- (8) Za štetu na stvarima i osobama uslijed zagađivanja tla i/ili vode; štete zagađenja (onečišćenja) okoliša;
- (9) Zbog prekoračenja i nepridržavanja određenih rokova, od strane suda ili naručioca, za vještačenje i posljedičnih šteta proizašlih iz tog prekoračenja;
- (10) Za štete uslijed štrajka, obustave rada, političkih ili ratnih rizika bez obzira da li je rat objavljen ili nije;
- (11) Koje je vještak učinio postupajući po nalogu suda;
- (12) Ugovorne kazne i penali, primjerne štete, posljedične štete bilo koje vrste npr. gubitak zarade, posla i sl.;
- (13) Zbog namjerno i prevarom prouzročenih šteta od strane ugovarača osiguranja ili osiguranika, ili zbog šteta nastalih kao posljedica svjesnog postupanja suprotno propisima po kojima se obavlja njegova registrovana djelatnost;
- (14) Odštetni zahtjevi koji proizlaze iz povrede prava na ugled, dobar glas, čast, dostojanstvo, poslovnu tajnu, slobodu privređivanja i sl.;
- (15) Zbog šteta koje je učinio vještak nalogodavcu postupajući po njegovu nalogu;
- (16) Zbog propusta ili grešaka vještaka nastalih prije zaključivanja ugovora o osiguranju od odgovornosti pa čak i ako se šteta manifestuje nakon zaključenja ugovora;

- (17) Zbog šteta proizašlih uslijed nelikvidnosti ili insolventnosti, prekida ili obustave rada, odnosno aktivnosti osiguranika;
- (18) Zbog šteta proizašlih kao posljedica uništenja, oštećenja ili nestanka bilo koje vrste podataka;
- (19) Štete koje nastanu zbog oštećenja, uništenja ili nestanka hartija od vrijednosti, novca i sl., osim dokumentacije koja je u vezi s obavljanjem osigurane djelatnosti;
- (20) Zbog šteta proizašlih kao posljedica bilo koje vrste povrede autorskih prava, патената, trgovačkog imena/marke, logotipa ili slogana;
- (21) Zbog šteta proizašlih uslijed manjka u blagajni, grešaka u isplati, prevare ili pronevjere od strane osiguranika ili osoba za koje on po zakonu odgovara;
- (22) Zbog posljedičnih šteta kao što su zabrana uvoza ili izvoza, gubitak tržišta, pad cijena, i sl.;
- (23) Zbog finansijskog gubitka do kojeg dođe uslijed prekida poslovanja;
- (24) Zbog šteta koje proizlaze iz zakonske odgovornosti članova uprave osiguranika ili drugih odgovornih osoba, u obavljanju njihove funkcije;
- (25) Zbog šteta koje proizlaze iz odgovornosti osiguranika kao poslodavca;
- (26) Zbog šteta nastalih uslijed prekoračenja ovlaštenja,
- (27) Zbog šteta koje nastanu zbog neispunjavanja obaveza naručioca usluge, koje su određene u ugovoru,
- (28) Za štete koje nastanu zbog narušavanja ugleda ili dobrog imena.

Član 7.

Obaveze ugovarača osiguranja

- (1) Ugovarač osiguranja obavezan je:
 - 1) pri zaključenju ugovora o osiguranju prijaviti sve okolnosti koje je znao ili koje je morao znati, a važne su za ocjenu rizika;
 - 2) pri zaključenju ugovora o osiguranju platiti premiju na ugovoren način;
 - 3) izvijestiti osiguravača o svakoj promjeni okolnosti koja može biti važna za promjenu rizika, nezavisno da li je rizik promijenjen njegovom voljom ili postupkom ili bez njegova utjecaja;
- (2) ako ugovarač namjerno zataji određene podatke i činjenice, a oni su po prirodi takvi da je osiguravač znao za njih ne bi zaključio ugovor o osiguranju, osiguravač ima pravo raskinuti ugovor o osiguranju;
- (3) pravo iz prethodnog stava ovog članka osiguravač ima i nakon postavljenog zahtjeva za naknadu štete.

Član 8.

Osiguranikove obaveze nakon nastanka osiguranog slučaja

- (1) Osiguranik je dužan obavijestiti osiguravača o nastanku osiguranog slučaja i o podnesenom zahtjevu za naknadu štete najkasnije u roku od tri (3) dana od dana saznanja.
- (2) Osiguranik je dužan obavijestiti osiguravača i onda kada zahtjev za naknadu štete protiv njega bude pokrenut putem suda, kada bude stavljen u pritvor i onda kada bude poveden postupak za osiguranje dokaza.
- (3) Osiguranik nije ovlašten da se bez prethodne saglasnosti osiguravača izjašnjava o zahtjevu za naknadu štete, a posebno da ga prizna potpuno ili djelimično, da se o zahtjevu o naknadi štete nagodi ni da obavi isplatu, osim ako se prema činjeničnom stanju nije moglo odbiti priznanje, nagodba ili isplata, a da se time ne učini očigledna nepravda. Ako je osiguranik u zabludi smatrao da postoji njegova odgovornost ili da su ispravno utvrđene činjenice, to ga neće opravdati.

(4) Ako oštećenik podnese tužbu za naknadu štete protiv osiguranika, osiguranik je dužan dostaviti osiguravaču sudski poziv ili tužbu i sve spise u vezi sa štetnim događajem i zahtjevom za naknadu štete te vođenje spora prepustiti osiguravaču.

(5) Ako se osiguranik protivi prijedlogu osiguravača da se zahtjev za naknadu štete riješi nagodbom, osiguravač nije dužan platiti višak naknade, kamata i troškova koji su zbog toga nastali.

(6) Ako se oštećenik sa zahtjevom za naknadu štete direktno obrati osiguravaču, osiguranik je dužan osiguravaču pružiti sve dokaze i podatke kojima raspolaže, a koji su neophodni za utvrđivanje odgovornosti za učinjenu štetu i za ocjenu osnovanosti zahtjeva, obima i visine štete.

(7) Ako se osiguranik ne drži obaveza iz ovog člana, snositi će štetne posljedice koje zbog toga nastanu, osim ako bi one nastale i da se držao obaveza.

Član 9.

Obaveze osiguravača nakon zahtjeva oštećene osobe

(1) U vezi sa podnesenim zahtjevom za naknadu štete od strane oštećene osobe, osiguravač je u obavezi:

- 1) zajedno sa osiguranikom preduzeti odbranu od neosnovanih ili pretjeranih zahtjeva za naknadu štete (pravna zaštita);
- 2) udovoljiti osnovanim zahtjevima za naknadu štete;
- 3) naknaditi troškove sudskog postupka (naknada troškova postupka).

Član 10.

Pravna zaštita

(1) Obaveza Osiguravača u pružanju pravne zaštite obuhvata:

- 1) ispitivanje osiguranikove odgovornosti za nastalu štetu;
- 2) vođenje spora u osiguranikovo ime ako oštećeni ostvaruje pravo na naknadu štete u parničnom postupku;
- 3) davanje u osiguranikovo ime svih izjava koje smatra korisnim; za zadovoljenje ili odbranu od neosnovanog, ili pretjeranog zahtjeva za naknadu štete.
- (2) Uz saglasnost i upute osiguravača, vođenje spora može se povjeriti osiguraniku, koji je tada dužan držati se uputa i naloga osiguravača u pogledu vođenja postupka u parnici.
- (3) Osiguravač može preuzeti vođenje parnice ili stupiti na mjesto osiguranika ili sudjelovati u svojstvu umješaka.
- (4) Osiguravač je ovlašten odbiti vođenje spora ili prepustiti vođenje spora osiguraniku, ako ocjeni da nema više mjesta za pružanje pravne zaštite sa obzirom na odnos visine zahtjeva za naknadu štete i visine iznosa osiguranja.
- (5) U slučaju da osiguravač na ime naknade štete isplati odštetu prije pokretanja spora, prestaje i njegova obaveza na pravnu zaštitu.

Član 11.

Naknada troškova postupka

(1) Osiguravač naknađuje sve troškove parničnog postupka ako sam vodi spor, ili je dao saglasnost osiguraniku na vođenje spora, pa i onda kada zahtjev za naknadu štete nije bio osnovan.

(2) Ako je parnica vođena bez znanja i saglasnosti osiguravača, osiguranjem su pokriveni troškovi spora ako zajedno sa naknadom štete ne premašuju osiguranu sumu.

(3) Osiguravač plaća troškove branitelju u krivičnom postupku pokrenutu protiv osiguranika zbog događaja koji bi mogao imati za posljedicu postavljanje zahtjeva za naknadu štete na temelju odgovornosti pokrivena osiguranjem, i to samo ako je obaviješten o izboru branitelja i ako je

prihvatio plaćanje tih troškova. Troškove krivičnog postupka i troškove zastupanja oštećenika osiguravač ne nadoknađuje.

Član 12.

Neposredni zahtjev oštećene osobe

(1) Ako oštećena osoba zahtjev ili tužbu za naknadu štete podnese samo prema osiguravaču, osiguravač će o tomu obavijestiti osiguranika i pozvati ga da pruži sve potrebne podatke, te da sam preduzme mjere radi zaštite svojih interesa.

(2) Ako se u slučaju iz prethodnog stava osiguravač odluči isplatiti naknadu oštećeniku, u potpunosti ili djelomično, dužan je o tomu obavijestiti osiguranika.

(3) Oštećena osoba može zahtijevati neposredno od osiguravača naknadu štete za koju odgovara osiguranik, ali najviše do iznosa obaveze osiguravača.

Član 13.

Premija osiguranja

Premiju osiguranja ugovarač osiguranja obavezan je platiti u cijelosti pri ispostavljanju polise, ako se ne ugovori drugačije.

Član 14.

Početak obaveze osiguravača

Obaveza osiguravača iz ugovora o osiguranju počinje po isteku 24. sata dana koji je u ispravi o osiguranju naveden kao početak osiguranja, ako je do tog datuma plaćena premija odnosno nakon isteka 24. sata dana kada je premija plaćena, ili prva rata premije ako je ugovoreno plaćanje na rate, ako nije drugačije ugovoreno.

Član 15.

Završne odredbe

(1) Na ugovor o osiguranju zaključen po ovim uslovima primjenjuju se odredbe Zakona o osiguranju, Zakona o obligacionim odnosima, kao i odredbe drugih propisa koji regulišu ovu materiju.

(2) U slučaju spora između ugovarača osiguranja, odnosno osiguranika i osiguravača, nadležan je stvarno nadležni sud prema sjedištu osiguravača, ukoliko se drugačije ne ugovori.

(3) Na ugovore o osiguranju zaključene u skladu sa odredbama ovih uslova, primjenjuju se i odredbe Opštih uslova za osiguranje od odgovornosti, osim u dijelu koji je ovim uslovima drugačije uređen.

Član 16

Stupanje na snagu i primjena

Ovi Uslovi za osiguranje od odgovornosti vještaka stupaju na snagu i primjenjuju se danom donošenja.

Banja Luka, 22.12.2020. godine

Predsjednik upravnog odbora
Marko Mikić